



Inatsisartuni ilaasortaq Jens Napātōk, Partii Naleraq

Upernavik Kujalleq pillugu § 37 naapertorlugu apeqquteqaammut 2018-277-imut akissut

22-11-2018
Suliaq normu: 2018-22162
Id normu: 34655876

Asasara Jens Napātōk

Apeqquteqaammut Inatsisartut Suleriaasianni § 37 naapertorlugu nassiussimasannut, qujanaq. Apeqqutit ataasiakkaarlugit matuma kinguliani issuarneqarput, akissuteqaat kingornaniilluni.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqqut 1: Naalakkersuisut Upernavik Kujallermut illu sulliviliornissamut arlaatigulluunniit sanaartornissamut qanoq pilersaaruteqarpat?

Akissut: Januaarip aallaqqaataa 2017 aallarnerfigalugu Inatsisartut Aningaasanut Inatsisaat 2017-imi kontomi pingaarnermi 87.72.22 Nunaqarfinni isorliunerusunilu inissialortiternermut pilersaarut, aningaasaliissutit, ilaatigut kommunit ataatsimoorussanik illuliortiternerinut tapiissutinik ilaqtartut kommuninut nuunneqarnissaat ilanngunneqarpoq. Taamaattumik kommunit namminneerlutik illunik sullivinnik sanaartornerni tullerriaarisussaapput.

Apeqqut 2: Upernavik Kujallermi tunitsiveqarnerup talittarfeqarnerullu tungaatigut inerisaanissaq sunik nalunngisaqarfivaat aammalu qanoq pilersaaruteqartoqarpa?

Akissut: Tunisassiornermut atortut pillugit:

Inuussutissarsiornermut Nukissiuuteqarnermullu Naalakkersuisoqarfik imaattumik akissuteqarluni ilassuteqarpoq:

”Misissuineramik, Kalaallit Nunaanni nunaqarfinni tamani tunitsivinnik nalunaarsuiffiusumik peqartoqarmat ilisimatitsissutigineqarsinnaavoq. Tassani ‘Nunaqarfinni isorliunerusunilu aalisarnermik inuussutissarsiornermi suliassat annertusinissaannut periarfissat pillugit nalunaarusiaq’ pineqarpoq. Nalunaarusiami nunaqarfinni assigiinngitsuni pissutsit arlallit, soorlu umiarsualiveqarnikkut pissutsit innaallagissamillu pilersuineq nalunaarsorneqarput. Tamatuma peqatigisaanik ilaatigut Upernavik Kujallermi aalisakkat suut tunisassiarineqarnersut allaaserineqarput.

Aamma nalunaarusiami ilaatigut Upernavik Kujallermi tunitsivik Royal Greenlandimit ingerlanneqartoq, aammalu ullup unnuallu ingerlanerani qaleralinnik 3 tonsinik tiguisinnaasoq, 80 tonsinillu qerititsinissamik pisinnaasaqartoq allassimavoq, tak. Nunaqarfinni Isorliunerusunilu aalisarnermik inuussutissarsiornermi suliassat annertusinissaannut periarfissat pillugit nalunaarusiamut ilanngussa 1.

Aammalu Naalakkersuisut Kalaallit Nunaat tamakkerlugu inuussutissarsiornermut piumasaqaatinut sinaakkusiussat ingerlaavartumik pitsanngorsarpaat. Naalakkersuisut ilaatigut Aningaasanut inatsit aqqutigalugu nunaqarfinni isorliunerusunilu

inuussutissarsiornerup suliffeqarnerullu ineriartortinneqarnissaannut anguniagaqarnermut tapersersuipput. Assersuutigalugu konto pingaarneq 64.01.05 Nunaqarfinni isorliunerusunilu inuussutissarsiornermi suliffeqarnermilu ineriartortitsineq aqutigalugu tunisassiorfiit tunitsivittut atorneqartut ingerlanneqarneri pillugit isumaqatigiissusiornermut tapersiisoqarsinnaavoq. Aningaasat taakku ilaat aamma kommunit kissaateqarpata, nunaqarfinni tunisassiornermut atortunik pilersitsinerneq atorneqarsinnaapput.

Kiisalu ilisimatitsissutigineqarsinnaavoq, nunami tunitsiviit innaallagissamik imermillu pilersorneqarnerannik ataqatigiissaarinnissaq pillugu Nukissiorfinniit aalisakkeriviit il.il. ataatsimeeqatigineqarsimmata. Taakku pillugit annertunerusumik ataqatigiissaarinnissaq pilersaarutigineqarpoq.”

Talittarfinni atortut pillugit:

Nunatsinni umiarsualiveqarfinnik aserfallatsaaliuinerit iluarsaassinerillu nunap immikkoortuini aserfallatsaaliuinissamut suliniutit, Umiarsualivinnut Pilersaarut 2017-2027-mi allaaserineqartut naapertorlugit isumagineqarput.

Suliniuummi nunap immikkoortui tallimanut aggorneqarput: Kujataa, Tunu, Qeqqa, Qeqertarsuup Tunua aamma Avannaq. Ukiut tamaasa nunap immikkoortuani ataatsimi qanoq issutsimik nalunaarsuisoqartarpoq, nunallu immikkoortuani ataatsimi aserfallatsaaliuisoqartarluni. Avannaani kingullermik qanoq issutsimik nalunaarsuineq 2012-imi aamma 2016-imi pivoq.

2012-imi qanoq issutsimik nalunaarsuineq tunngavigalugu aalajangerneqarpoq, Upernavik Kujallermi “talittarfik puttasoq” talittarfimmik aalaakkaasumik taarserneqassasoq, ukiut tamaasa ukiuunerani siku puttasunut annertuumik ajoqusiisarmat. Talittarfik 2015-imi naammassineqarpoq. 2016-imi qanoq issutsimik nalunaarsuinerneq oqaaseqaatissaqartoqanngilaq. Talittarfik iluarsaataq pitsaasuvoq.

Avannaani qanoq issutsimik nalunaarsuineq tulleeq 2022-mi pissaaq.

Inussiarnersumik inuulluaqqusillunga



Aqqalu Jerimiassen